

desperata, es ist alles auß / alle Hoffnung ist verloren / hie ist kein rath noch hülff mehr: Er nennets einen unheilbaren Schaden / den niemand heilen kan / wie weiß / verständig vnd kunstreich er sey: einen Schaden / da jederman die Hand abthue / vnd davon ziehe.

Welches alles gleichwol nicht absolute vnd bloß zuverstehen / als wenn es durch auß vnmöglich / daß dem Jüdischen Volck auß seinem Gefängnuß / Jammer vnd Elend wider sollte geholffen werden / denn bald hernach der HERR mit gar trostreichen Worten sagt: Ich will dich wider gesund machen / vnd deine Wunden heilen: Ich will deine Gefängnuß wenden / vnd die Statt Jerusalem soll wider auff ihre Hügel gebawet werden / vnd der Tempel soll stehen nach seiner weise: sondern alles comparatè vnd in gewisser maß / nemlich dahin / daß der HERR zuvorderst anzeigen will / es sey vmb die hinführung des Jüdischen Volcks auß irem Land / vnd sonderlich von der Stadt Jerusalem in das Land Babel / auch vmb die Gefängnuß an ihr selbst nicht ein schlechtes geringes Rüttlein / sondern eine sehr harte Straffe / ein scharffes flagellum, vnd bittere Geißel / die blütige Striemen vnd grosse Wunden mache / massen auch auß den Umständen erscheinet.

Denn so viel die antecedentia vnd was ohne mittel vorher gangen / belanget / ist die Stadt Jerusalem ganzer achzehen Monat lang von dem König Nebucadnezar belagert gehalten worden / daß niemand weder auß / noch einkommen können / vnd ist derselbe nicht still gelegen / sondern / wie es Josephus lib. 10. von den alten Jüdischen Geschichten beschreibet cap. 11. hat er vmb vnd vmb grosse / hohe Schütze vnd Wälle auffgeworffen / die der Stattemauren gleich in der Höhe gewesen / von denen er ohne vnterlaß hefftig gestürmet / vnd sich je näher vnd näher an die Statt gemacht / in welcher vnter des Pest hefftig grassiret / als ein harter innerlicher Feind / noch mehr der Hunger vnd Mangel an Speiß vnd Tranck / davon Jeremias ganz kläglich redet in seinen Klagliedern cap. 4. Dem Säuglinge klebet seine Zunge an seinem Gaumen für Durst / die jungen Kinder heischen Brod / vnd ist niemand / ders ihnen breche: die vorhin das niedlichste assen / verschmachten auff der Gassen: Es haben die barmherzigsten Weiber ihre Kinder selbst kochen müssen / daß sie zuessen hätten in dem Jammer der Tochter meines Volcks. Letzlich hat Nebucadnezar in die

Statt

Quam re-  
citat.

I.  
Ratione  
antecedentium.

Obsidio-  
nis & expu-  
gnationis  
urbis.  
Ioseph. de  
antiq. l. 10.  
cap. 11.

Ier. lam.  
cap. 4.